

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
18.10 रविवार दिनांक 11.05.2025

प्रमुख समाचार –

- संघर्ष विराम ल देखत हुए प्रधानमंत्री ह आज नई दिल्ली म करीन बड़का बइठक—दूनों देस के बीच काली एक घांव फेर होही गोठ ।
- आज लखनऊ म रक्षामंत्री ह ब्रम्होस एयरोस्पेस इंटिग्रेशन एण्ड टेस्टिंग फेसिलिटी के वर्चुअल माध्यम ले करीन उद्घाटन— किहीन सरकार ह आतंकवाद के खिलाफ जीरो टालरेंस के नीति ल अपनाय हे ।
- छत्तीसगढ़ म अवैध रूप ले रहइया विदेसी अउ बांग्लादेस ले आय लोगन मनके पहिचान बर एक ठिन स्पेसल टास्क फोर्स—एसटीएफ के होही गठन ।

प्रधानमंत्री—उच्च स्तरीय बैठक

प्रधानमंत्री नरेंद्र मोदी ह आज नई दिल्ली के अपन आवास म एक ठिन बड़का बइठक करीन । ए बइठक म रक्षामंत्री राजनाथ सिंह, विदेश मंत्री शुभ्रमण्यम जयशंकर, राष्ट्रीय सुरक्षा सलाहकार अजीत डोभाल, रक्षा प्रमुख जनरल अनिल चौहान, थल सेना प्रमुख जनरल उपेन्द्र द्विवेदी, नौसेना प्रमुख एडमिरल दिनेश त्रिपाठी अउ वायु सेना प्रमुख एयर चीफ मार्शल अमरप्रीत सिंह ह मौजूद रिहीन ।

ए बइठका ह काली दूनों देस के सैन्य अभियान महानिदेसक मनके एक—दूसर ले गोठ करे बाद संघर्ष विराम ल देखत हुए करे गीस । दूनों देस के ए अधिकारी मन ह काली एक घांव फेर गोठ करइया हे ।

एखर ले पहिली विदेस सचिव विक्रम मिसरी ह काली नई दिल्ली म मीडिया ल बताय रिहीन कि भारत, पाकिस्तान कोति ले संघर्ष विराम उल्लंघन ल बहुत गंभीरता ले लेवत हे । ओमन ह किहीन कि सशस्त्र बल स्थिति उपर नजर राखे जात हे अउ ओमन ल अंतर्राष्ट्रीय सीमा के संगेसंग नियंत्रण रेखा म उल्लंघन के कोनो भी घटना ले सक्ती ले निपटे के निरदेस दे गेहे ।

रक्षामंत्री-ब्रम्होस

रक्षामंत्री राजनाथ सिंह ह किहीन हे कि ऑपरेशन सिंदूर ह सिरिफ सैन्य कार्रवाई नो हरय बल्कि भारत के राजनीतिक, सामाजिक अउ सामरिक इच्छा सक्ति के प्रतीय हरय। आज लखनऊ म ब्रम्होस एयरोस्पेस इंटीग्रेशन एण्ड टेस्टिंग फेसिलिटी के वर्चुअल माध्यम ले उद्घाटन करत हुए रक्षामंत्री ह किहीन कि ए ऑपरेशन ले आतंकवाद के खिलाफ भारत के दृढ़ इच्छा सक्ति अउ सैन्य सक्ति के पता चलथे। ओमन ह किहीन कि जब भी भारत ह आतंकवाद के खिलाफ कोनो भी कार्रवाई करही, त सीमा पार के जघा ह आतंकवादी मन बर सुरक्षित नइ रइही। श्री सिंह ह किहीन कि भारतीय सेना ह ऑपरेशन सिंदूर ल पाकिस्तान म आतंकवादी ठिकाना ल खतम करे के उद्देश्य ले सुरु करे रिहीन अउ लोगन मनके रहइया जघा ल कभू लक्ष्य नइ बनाय गे रिहीस, फेर पाकिस्तान ह भारत के अइसने जघा ल अपन निसाना बनाइस अउ संगेसंग मंदिर, गुरुद्वारा अउ चर्च म हमला घलो करीस। रक्षामंत्री ह किहीन कि सरकार ह आतंकवाद के खिलाफ जीरो टालरेंस के नीति ल अपनाय हे अउ ब्रम्होस एयरोस्पेस इंटीग्रेशन एण्ड टेस्टिंग फेसिलिटी ले देस के मारक सक्ति बाढ़ही। ओमन ह किहीन कि आज राष्ट्रीय टेक्नालाजी दिवस म ए सुविधा के सुरु होना बिसेस रूप ले महत्वपूर्ण हवय।

ऑपरेशन-सिंदूर-वायुसेना

वायु सेना ह किहीन हे कि ऑपरेशन सिंदूर के चलत ओमन ल जउन काम दे गे रिहीस, ओ सबो ल अच्छा तरीका ले ओमन ह पूरा करे हे। सोसल मीडिया पोस्ट म वायुसेना ह किहीन हे कि सबो ऑपरेशन ह राष्ट्रीय हित ल धियान म राखत हुए बढ़िया तरीका ले चलाय गेहे। अभी ऑपरेशन ह चलत हे अउ बेरा राहत सही समय म एखर जानकारी दे जाही। वायुसेना ह सबो झिन ले आग्रह करे हे कि ओमन ह अटकलबाजी ले बांचय अउ जउन खबर के पुष्टि नइ होय हे अइसने जानकारी ल साझा झन करय।

राजभवन-सर्व धर्म सभा

राज्यपाल रमेन डेका के अध्यक्षता म राजभवन म सर्व धर्म सभा के आयोजन करे गीस। एमा मुख्यमंत्री विष्णुदेव साय ह घलो सामिल होइन। ए बेरा म राज्यपाल ह किहीन कि अभी के बेरा ल देखत हुए हमर मनके जिम्मेदारी बनथे, कि हमन ह समाज म संयम, सांति अउ सदभाव ल बनाय राखन। ओमन ह किहीन कि जब राष्ट्र ह संघर्ष करत हे, त सिरिफ सीमा म तैनात हमर सैनिक ही नइ बल्कि देस के हरेक लोगन के चेतना, एकता अउ संकल्प ही राष्ट्र के सबले बड़े सक्ति हवय। उहें, मुख्यमंत्री ह ए बइठका म किहीन कि सबो धर्म के प्रतिनिधि मन ह एकता के संकल्प ल दोहराय हे। ए घड़ी म हम सबो मन ल ए दिखाना हे कि हमन ह एक संघरा हवन। ओमन ह सेना के सौर्य के तारीफ करत हुए किहीन कि लोगन मन ल सोसल मीडिया म आय वाले भ्रामक सूचना ले सतर्क रहना चाही। ए कारीकरम म सबो धर्म के प्रमुख लोगन मन सामिल होइन। ए बेरा म आतंकी हमला म अपन जान गवाय वाला लोगन मन ल श्रद्धांजलि घलो दे गीस।

राष्ट्रीय प्रौद्योगिकी दिवस

आज राष्ट्रीय प्रौद्योगिकी दिवस हरय। बछर उन्नीस सौ अठानवे म इही दिन भारत ह राजस्थान के पोखरण म परमाणु बम के सफल परीक्षण करे रिहीस। प्रधानमंत्री नरेंद्र मोदी अउ छत्तीसगढ़ के मुख्यमंत्री विष्णुदेव साय ह राष्ट्रीय प्रौद्योगिकी दिवस म अपन सुभकामना दीन। सोसल मीडिया म पोस्ट करत हुए प्रधानमंत्री ह किहीन कि ए दिन ह देस के वैज्ञानिक मनके प्रति गर्व अउ आभार व्यक्त करे अउ उन्नीस सौ अठानवे के पोखरण परीक्षण ल सुरता करे के दिन हे।

विदेशी नागरिक—विशेष अभियान

छत्तीसगढ़ म अवैध रूप ले राहत विदेशी लोगन अउ बांग्लादेस ले आय लोगन मनके पहिचान बर एक ठिन बिसेस अभियान चलाय जाही। ए अभियान के चलत सबो जिला म स्पेसल टास्क फोर्स—एसटीएफ के गठन करे जाही। जउन के संदिग्ध लोगन मनके दस्तावेज के जांच करही। एखर बारे म पुलिस मुख्यालय ह सबो जिला के पुलिस अधीक्षक मन ल दिसा—निरदेस जारी कर दे हे।

गृहमंत्री विजय शर्मा ह किहीन हे कि राज्य म बिना कोनो वैध दस्तावेज के अवैध रूप ले रहात अप्रवासी अउ आने मनखे मनके पहिचान बर बिसेस अभियान चलाय जाही।

माओवाद—मोबाइल टावर

नारायणपुर जिला के माओवाद प्रभावित सोनपुर क्षेत्र के होरादी कैम्प म नवा मोबाइल टावर ल लगाके दूरसंचार व्यवस्था ल सुरू करे गेहे। एखर ले तीर—तखार के रहइया लोगन ल मोबाइल कनेक्टिविटी अउ इंटरनेट के सुविधा ह आसानी ले मिल सकही। नवा मोबाइल टावर लगे ले लोगन मन म खुसी के माहौल हे। गांव के रहइया लोगन मनके कहना हे कि एखर ले ओमन ह शासकीय योजना ले लाभांवित होही अउ ओमन ल देस—विदेस के घटना के जानकारी घलो मिल सकही। ए मोबाइल टावर लगाय म सुरक्षा बल मनके बिसेस योगदान रिहीस।

तेंदुआ—मौत

रायपुर के नंदनवन म रहात एक झिन नर तेंदुआ के लंबा बीमारी के बाद आज मउत हगे। वन विभाग ले मिले जानबा के अनुसार ए तेंदुआ के उमर ह करीबन सोलह बछर ले जादा रिहीस। पाछू कुछेक महिना ले ओखर गाल म ट्यूमर हगे रिहीस, जेखर इलाज चलत रिहीस। नरसिंह नाव के ए तेंदुआ ह पाछू कतकोन बछर ले नंदनवन म लोगन मन बर आकर्षण के केंद्र रिहीस। ए तेंदुआ ल बछर दू हजार चौदह म बालोद परिक्षेत्र ले रेस्क्यू करे गे रिहीस। वन अधिकारी मन ह बतइन कि पोस्टमार्टम के बाद तेंदुआ के अंतिम संस्कार कर दे गेहे।

हाथी हमला—मौत

रायगढ़ जिला के गेमकेला गांव म पाछू रतिहा जंगली हाथी मनके हमला म दू झिन माईलोगिन के मउत हगे। उहें, एक झिन आने ग्रामीण ह गंभीर रूप ले घायल हगे हे। जानबा के अनुसार ए माईलोगिन मन

ह अपन घर के बाहिर म सोवत रिहीन, फेर इही बेरा म अपन झुण्ड ले बिछड़ के एक झिन हाथी ह गांव कोति आगे अउ सोवत हुए ए माईलोगिन मन उपर हमला कर दीन, जेखर ले एक झिन के तुरते मउत होगे अउ उहें, एक झिन आने माईलोगिन ह अस्पताल म इलाज के बेरा म दम तोड़ दीस। हाथी के हमला ले घायल एक झिन आने ग्रामीण ल अस्पताल म भर्ती कराय गेहे।

घटना के जानकारी मिलतेच वन विभाग के टीम ह मउका म पहुँचिन अउ आगू के कार्रवाई करीन। अधिकारी मनके कहना हे कि हाथी मनके निगरानी अउ आगू के स्थिति उपर काबू पाय बर एक टिन बिसेस टीम ल तैनात करे गेहे। संगेसंग गांव वाला मन ल सावधानी बरते बर कहे गेहे।

राष्ट्रीय लोक-अदालत

राज्य विधिक सेवा प्राधिकरण कोति ले काली प्रदेस के सबो जिला अउ व्यवहार न्यायालय म राष्ट्रीय लोक अदालत के आयोजन करे गे रिहीस। एमा अड़तालीस लाख अंठानवे हजार ले जादा मामला के सुनवाई करे गीस, जेमा पांच सौ तिरानवे करोड़ रुपिया के अवार्ड ल पारित करे गीस।

छत्तीसगढ़ उच्च न्यायालय के मुख्य न्यायधीश रमेश सिन्हा ह जिला अउ सत्र न्यायालय म आयोजित नेशनल लोक अदालत के कार्रवाई के वर्चुअल निरीक्षण करीन। संगेसंग ओमन ह सबो जिला के प्रधान जिला न्यायाधीश मनके संग गोठ घलो करीन।
